

DATE : 6 May 2015
PUBLICATION : Kosmo!
SECTION :
HEADLINE : MAMG unjur AUM cecah RM20 bilion tahun 2015

 **Kosmo!**
SUARA KONTEMPORARI

6 MEI 2015

MAMG unjur AUM cecah RM20 bilion tahun 2015



DARI kiri, Timbalan Ketua Eksekutif Bosera, Conrad Cheng; Ketua Perbankan Global Kumpulan Maybank, Amirul Feisal Wan Zahir dan Nor' Azamin menyempurnakan majlis pelancaran Maybank Bosera Greater China ASEAN Equiti-i Fund di Kuala Lumpur semalam.

KUALA LUMPUR - Maybank Asset Management Group Bhd. (MAMG) mengunjurkan jumlah aset di bawah pengurusannya (AUM) bakal meningkat kepada RM20 bilion pada tahun ini berbanding RM15.2 bilion pada masa sekarang.

Sasaran itu dijangka dipacu oleh produk dana ekuiti Islam terbaharunya, Maybank Bosera Greater China ASEAN Equiti-i Fund.

Ketua Pegawai Eksekutif MAMG, Nor' Azamin Salleh berkata, daripada nilai itu sebanyak RM9 bilion disasarkan khusus bagi portfolio AUM berlandaskan syariah iaitu peningkatan daripada RM6.6 bilion yang direkodkan sehingga 31 Mac lalu.

"Meskipun 2015 dilihat sebagai

satu tahun yang mencabar, kami yakin rantau ini masih mampu menawarkan potensi pelaburan yang besar terutamanya bagi pasaran ekuiti di China.

"Justeru, menerusi dana ekuiti Islam yang baru dilancarkan ini, kami optimis ia mampu menjana nilai aset antara RM70 juta hingga RM100 juta untuk tahun ini bagi pasaran Malaysia dan lebih tinggi bagi pasaran China, Hong Kong, Singapura dan Thailand," katanya pada sidang akhbar sempena pelancaran Maybank Bosera Greater China ASEAN Equiti-i Fund di sini semalam.

Dana tersebut dilancarkan dengan kerjasama Maybank Asset Management Sdn. Bhd. dan Maybank Islamic Asset Management Sdn. Bhd., cabang pengurusan

aset bagi Kumpulan Maybank serta Bosera Asset Management (International) Co. Ltd. (Bosera).

Menurut Nor' Azamin, Maybank Bosera Greater China ASEAN Equiti-i Fund merupakan dana berlandaskan syariah pertama yang diperkenalkan di bawah skim passport ASEAN dan diluluskan di bawah Suruhanjaya Sekuriti pada Mac 2015.

"Ia memberikan peluang kepada pelabur untuk meraih potensi yang ditawarkan oleh ekuiti Islam di wilayah besar China serta lain-lain negara di rantau ASEAN," jelasnya.

Maybank Bosera Greater China ASEAN Equiti-i Fund merupakan dana dagangan terbuka yang menawarkan peluang pelaburan dalam tiga kelas berbeza.